



30. januar 2015

UPA 2015/42

Inatsisartut Suleriaasianni § 33 naapertorlugu aalajangiiffisassatut siunnersuut imattoq matumuuna saqqummiuppara:

Inatsisartuni Naalakkersuisunilu il. il. ilaasortat aningaasarsiaqartitaanerat il. il. pillugit Inatsisartut inatsisissaani nr. 22-mi, 18. december 2003-meersup (akissarsiaqarnermut Inatsit) imatut allanngortinnissaanut siunnersuuteqaqqullugit Naalakkersuisut peqquneqarnissaannik Inatsisartut aalajangiiffisassaattut siunnersuut:

- 1) **Naalakkersuisuni Inatsisartuniluunniit ilaasortaasimasut sivisunerpaamik ilaasortaajunnaarnersiaqarsinnaatitaanerat apparneqassaaq qaammatini aqqaneq-marlunniit qaammatinut arfinilinnut.**
2. **Inatsisartuni Naalakkersuisuniluunniit ilaasortat ukiup atuuffiusup ataatsip allartinnerani ilaasortaajunnaarnersiutisiassaat qaammammik ataatsimik ilaneqartassapput.**
3. **Ilaasortaajunnaarnersiutisiaqarnissap sivikinnerpaaffia maannakkut qaammatinik pingasunik sivissussuseqartoq qaammammut ataatsimut apparneqassaaq.**

(Inatsisartunut ilaasortaq Randi Vestergaard Evaldsen, Demokraatit)

Tunngavilersuut

Politikerit Naalakkersuisutut aamma/imaluunniit Inatsisartuni ilaasortaasimasut ullumikkut ilaasortaajunnaarnersiutinik taaneqartartunik pisarput.

Ilaasortaajunnaarnersiutisiaqartarnerup minnerpaaffigaa qaammatini pingasuni akissarsiaqartarneq annerpaamillu qaammatini aqqaneq-marlunni. Ukiup atuuffiuup aallartinneri tamaasa ilaasortaajunnaarnersiutisiaqarnissamut katersat qaammatip aappaavillugu ilaneqartarput.

Demokraatini isumaqarpugut maannakkut malittarisassat kinguneranik Landskarsip aningaasaatai atulussinnarneqartut. Ajorpoq qaamatini pingasuni ilaasortaajunnaarnersiutisiaqartarneq Inatsisartuni Naalakkersuisuniluunniit sivikitsuinnarmik ilaasortaasimangaanni.

Aamma ajorpoq Inatsisartuni Naalakkersuisuniluunniit ilaasortaajunnaareernerup kingorna ukioq kaajallallugu ilaasortaajunnaarnersiutisiaqartinneqartarneq. Ajornavissinnaanngilaq ukiup affaata ingerlanerani suliffissamik allamik nassaarnissaq.

Demokraatini taamaattumik siunnersuutigaarput ilaasortaajunnaarnersiutisiaqartarnermut malittarisassat allanngortinneqassasut siunissami taamaallaat qaamatini arfinilinni ilaasortaajunnaarnersiutisiaqartoqartalissasoq apeqquatainnagu Inatsisartuni Naalakkersuisuniluunniit ilaasortaasimaneq.

Aamma siunnersuutigaarput ilaasortaajunnaarnersiutisiaqarnissaq qaammammik ataatsimik ilaneqartassasoq ukioq ataaseq Inatsisartutut Naalakkersuisutulluunniit sulisimangaanni. Kiisalu aamma siunnersuutigaarput, sivikinnerpaamik qaamatini pingasuni ilaasortaajunnaarnersiutisiaqartinneqartarneq qaammammut ataatsimut sivikillineqassasoq.

Siunnersuulli ilaasortaajunnaarnersiutisianut tunngatillugu pisinnaatitaaffinnut sunniuteqarnavianngilaq inatsip atuutilernissaa sioqquillugu katersorneqarsimasunut.

Taamatut oqaaseqarlunga Naalakkersuisut partiillu allat oqaaseqaatissaannut qilanaarpunga.

Pisortanut aningaasaqarnikkut allaffissornikkullu kingunerisassai:

Siunnersuut piviusunngussappat inatsisissamik siunnerssuusiorqartariaqarpoq. Allaffissornermi nukiit suliamut immikkoortinneqartussat inuup ataatsip ukiup affaani akissarsiaanit annerunissaat qularnarpooq ilanngutereerlugit nutserinissaq, tusarniaanissaq, inatsimmillu misissuinissaq.

Allannguisoqarpat Namminersorlutik Oqartussat Inatsisartuni Naalakkersuisunilu
ilaasortaasimasut ilaasortaajunnaarnersiutisiaat sipaaruteqarfigissavaat.

Inuuussutissarsiornermut aningaasaqarnikkut allaffissornikkullu kingunerisassai:
Soqanngilaq

Innuttaasunut aningaasaqarnikkut allaffissornikkullu kingunerisassai:
Soqanngilaq